

Bosna i Hercegovina
Federacije Bosne i Hercegovine
Kanton Sarajevo
Skupština Kantona Sarajevo
n/r g. Elvedin Okerić, Predsjedavajući Skupštine
n/r g. Samir Avdić, Ministarstvo kulture i sporta KS
n/r Vlada Kantona Sarajevo
n/r Skupština Kantona Sarajevo

Predmet: INICIJATIVA

34. Radna sjednica Skupštine Kantona Sarajevo

Poštovani,

u skladu sa Članom 106. i 213. Poslovnika Skupštine Kantona Sarajevo ("Službene novine Kantona Sarajevo" broj: 41/12 – Drugi novi prečišćeni tekst, 15/13 , 47/13, 47/15, 48/16, 9/20 i 14/20), Vladi Kantona Sarajevo odnosno Ministarstvu kulture i sporta Kantona Sarajevo **upućujem inicijativu da u najkraćem roku pokrenu formiranje Muzeja Holokausta u Sarajevu.**

OBRAZLOŽENJE:

Tvrđava Vraca je u Drugom svjetskom ratu bila mjesto na kojem su pogubljeni mnogi građani Sarajeva. Tri godine prije Olimpijade, 1981. godine, objekat je pretvoren u historijsko-memorijalni kompleks sa imenima 9.091 žrtve direktnog fašističkog terora u Sarajevu od kojih je 8.776 Jevreja. Spomen-park Vraca je vezan za Historijski muzej (bivši Muzej revolucije), za prošlost Sarajeva, za 6. april., dotiče temu Holokausta, no iako predstavlja idealan prostor za Muzej Holokausta, on to ipak nije.

Historijski muzej, bivši Muzej revolucije koji je u svojoj stalnoj postavci, između ostalog, prikazivao i stradanja Jevreja u Sarajevu za vrijeme Drugog svjetskog rata, trenutno je u svojstvu "Muzeja opsade Sarajeva" sa zbirkom eksponata iz posljednjeg rata i sobom posvećenom Dejtonskom mirovnom sporazumu, dok je u podrumu improvizovana postavka koja se bavi NOP i partizanskim oružanim otporom.

Stari Hram kojeg je Jevrejska opština poklonila gradu Sarajevu sada je Muzej Jevreja u sklopu kantonalne Javne ustanove Muzeji Sarajevo. U njemu postoji dio posvećen stradanju Jevreja u Drugom svjetskom ratu, dio koji je nesrazmjerno mali u poređenju sa tragedijom koja je pogodila ovu zajednicu u Sarajevu u tom periodu.

Veliki hram koji je Jevrejska opština, pored mnogih drugih prostora nakon Drugog svjetskog rata poklonila gradu sada je Bosanski Kulturni Centar. On raspolaže jednom manjom prodavnicom u kojoj se mogu kupiti predmeti vezani za Jevrejsku istoriju grada, no i dalje ne postoji mjesto u kojem današnja omladina ima priliku, koju smo mi nekoć imali, suočiti se sa dokumentima o stravičnim zlodjelima zvjerskog režima u sumraku historije ovog grada.

Građani i posjetioци Sarajeva nemaju gdje vidjeti fotografije Jasenovca, nemaju gdje, u adekvatnom, specijalizovanom muzejskom kontekstu i ambijentu vidjeti zlodjela i zločine nacističke ideologije jer u Sarajevu ne postoji Muzej Holokausta koji bi svjedočio i učio historijskoj činjenici da je 8.776 Sarajki i Sarajlija, žena, muškaraca, djece i staraca, sistemski, organizovano izdvojeno, odvedeno i ubijeno samo radi toga što su bili Jevreji.

Jevrejska opština je poklonila mnoge prostore gradu Sarajevu, prostore kojima trenutno upravlja Kanton Sarajevo. Mnogi od njih su bili sakralni objekti koji danas imaju sekularnu namjenu. Kanton Sarajevo bi mogao i trebao pokloniti građanima Sarajeva jedan uređen prostor Muzeja Holokausta i u njega premjestiti svu originalnu dokumentaciju (ili digitalne kopije) vezanu za stradanje sarajevskih Jevreja u Drugom

svjetskom ratu: sve fotografije, filmove, slajdove, eksponate, službene i privatne prepiske (ili digitalne kopije) koje su trenutno u posjedu javnih ustanova Kantona Sarajevo, ali i Historijskog muzeja. Kanton Sarajevo bi mogao i morao u najkraćem vremenskom periodu, sa najvećim mogućim entuzijazmom i dobrom voljom građana i svih učesnika ovog projekta, formirati kolekciju budućeg Muzeja Holokausta. Vlada Kantona Sarajevo i resorno ministarstvo bi iskomunicirali i pozvali sve stare Sarajke i Sarajlije da se okupe oko ovog projekta, da se uključe i učestvuju u prikupljanju kolekcije svedočanstava i dokumenata za sarajevski Muzej Holokausta.

Za sve oštećene, nestale i zagubljene eksponate javnih ustanova za koje je nadležan Kanton Sarajevo mora se insistirati na pismenim izvještajima apelujući da se isto uradi i na državnom nivou u slučaju kolekcije Historijskog muzeja, tj. bivšeg Muzeja revolucije.

Sarajevo, 07.04.2021. godine

Samostalni zastupnik u Skupštini KS

Damir Nikšić